

Jon-ate kaapiya nyendoos

Vakasin metumin-ate

¹ + o 1:1 Jon 1:1-2,4; 1Jon 2:13-14*Hey naanêêl vu ham naambe omaaho vakasin metumin-ate ond yoo nando munggin in va pin, tombe hey hango osin hey aahe lak hey amekaalus, yik hey aahe keen osin hey namangg lôôh.

² + o 1:2 Jon 1:14*Metumin-anju tok laam langaah atombe hey aahe, ondeey hey natulin osin hey naanêêl langaah vu ham nambe metumin danggata-têênu nando having Mangganaan, le tok laam langaah vu hey.

³ De va sen hey naahe osin hey nangoyinato, ond hey natulin vu ham having in nambe ham alompayo javuh ti gaving hey, tombe yiyy pin yalonggpayo javuh ti gaving Aamangg ayuuuh Noow Yesu Kalisi.

⁴ + o 1:4 Jon 16:24*Vakasin-anjo hey kaavu vu ham in nambe yahengg anivasa lôôt.

Anutu ond melangaah danggakook

⁵ + o 1:5 1Ti 6:16; Jem 1:17*In banye sen hey hango vu Anutu Noow-ambe hey naanêêl langaah vu ham-ato, ond nambe Anutu melangaah danggakook, de mekanu daka me-neep vu yi le, malis lôôt.

⁶ + o 1:6 1; Jon 2:4; Jon 3:21*Om yiyy naanêêl naambe yiyy ahondoos Anutu be yalonggpayo lavuh ti, lemu yiyy nala mop amekanu, ond

yiiy navu tatuhin-ambe yame naawiing va lohvu vakasin keen-ato le.

⁷ + o 1:7 Ais 2:5; Hiblu 9:14; Taato 1:5; 7:14*Nganjo naambe yiiy nando monaawiing va hôôk melangaah, nambe sen Anutu nando hôôk melangaah alopayôô-to, ond mem yiiy nando osin yalonggpayo lavuh ti, tonde Noow Yesu-te nihees navu kawiiy yate nipaya pin nala.

⁸ + o 1:8-9 Saam 32:5; Pro 28:13*Le yiiy naanêêl naambe yate nipaya ma, ond yiiy navu tatuhin yiiy, tombe vakasin keen-ame neep hôôk yalonggpayo le.

⁹ Nganjo yiiy naanêêl yate nipaya langaah, ond Anutu omaaho nivalok om le biing gaving yite vakasin-ambe kawiiy yate va nipaya na, de jipis yaningook pin na vêêl.

¹⁰ Yiiy naanêêl naambe yame aawiing va nipaya le, ond manyinjo yaanêêl nambe Anutu omaaho tatuhin vaha, tonde yite vakasin-ame lokaale yalonggpayo le.

2

Kalisi nahôôvu yiiy

¹ + o 2:1 Hiblu 7:25; 9:24*Sa noongg-aso, sa navu kaavu vakasin-anjo vu ham in nambe hamame ambiing va nipaya le, lemu ti nambe biing va nipaya, ond yate omaaho sen kataangg Mangganaan in yiiy-ato nando, ond yik omaaho nivalok Yesu Kalisi.

² + o 2:2 1; Jon 4:10,14; Jon 1:29; 11:52; Kol 1:20*In Yesu Kalisii-ju ond yate mop timu sen Anutu kawiiy yate va nipaya na, le me-yate nipaya

yoow e, nganjo hil pin-ate nipaya.

³ Naambe yiyy navu samu Anutu-te tanasin ond mem yalak ni vanuh nambe yalak Anutu ni keen.

⁴ + o 2:4 1; Jon 1:6,8*Omaaho ti naanêél naambe, “Sa lak Anutu ni,” lemu me-navu samu yite tanasin e, ond yi omaaho tatuhin ambu de vakasin keen-ame lokaale lopayo le.

⁵ + o 2:5 Jon 14:21,23; 1Jon 4:12,17; 5:3*De ti sen navu samu Anutu-te vakasin-ato, ond yite lopayo doos having Anutu keenaanôôn. Nambêênu ond mem yalak ni keen nambe yalonggpayo lavuh ti having Anutu.

⁶ + o 2:6 Jon 13:15*Omaaho ti nanêél nambe “Sa longgpayo timu having Anutu,” ond omaaho tii-ju yoo sapa mop anivalok naambe Yesuu-to.

Hil sen ahend having halindin-ato ond dando hôôk melangaah

⁷ + o 2:7 2Jon 5-6; 1Jon 2:24; 3:11*Sate va-so, same navu kaavu tanasin moos ti vu

ham e, nganjo sa navu kaavu tanasin bôôy sen yoo neep vu munggin-ato, de tanasin bôôy-anjo ond vakasin sen ham hango lung laa-to.

⁸ + o 2:8 Jon 1:9; 13:34; Lom 13:12*Lemu tanasin sen sa navu kaavu vu ham-anja ond yik tanasin moos, de Yesu navu taato nambe tanasin-anju keen, de ham navu taato having, in mekanu nalung nala de melangaah keen tum laam lung la.

⁹ + o 2:9 1; Jon 3:10,15; 4:20*Omaaho ti naanêél naambe lokando melangaah alopayo, lemu nayi hali paya lôôt, ond naahen nando hôôk mekanu lôôt-ambe gêên.

¹⁰ + o 2:10 Lom 14:13; Jon 11:9*Le naambe ti ahe naving hali, ond yoo nando hôök melangaah alopayo, de va nipaya ti me-neep hôök lopayo in nambe biing-ambe dupake le.

¹¹ + o 2:11 Jon 11:10; 12:35*Nganjo omaaho sen nayi hali paya lôöt-ato ond nando hôök mekanu, tombe nala mop osin mekanu, om doosin mop sen nalaa-to in taaku mekanu wiing-ambe mekaalus amekanu hôök lung la.

¹² + o 2:12 1Ko 6:11*Sate unoopasiv-aso, sa kaavu laas vu ham in Anutu ka navu Yesu be kawiyy hamate va nipaya la vêêl.

¹³ + o 2:13 1; Jon 1:1; Jon 1:1*Aamangg-aso, sa kaavu laas vu ham in ham alak omaaho sen yoo nando nyendoos-ato ni. Maanggêêm-aso, sa kaavu laas vu ham in ham laanggôôl omaaho nipaya Saalang lung la.

¹⁴ Sate unoopasiv-aso, sa kaavu laas vu ham in ham alak Aamangg ani. Aamangg-aso, sa kaavu laas vu ham in ham alak omaaho sen yoo nando nyendoos-ato ni. De maanggêêm-aso, sa kaavu laas vu ham in nambe ham atu hil aniweéêk-ambe Anutu-te vakasin lukaneep ham alompayo, om ham laanggôôl omaaho nipaya Saalang lung la.

Yahengg-ame gaving va voon-ate le

¹⁵ + o 2:15 Lom 8:7; Jem 4:4*Ham ahem-ame gaving va voon-ate le. Omaaho ti nambe ahe gaving va voon-ate ond ahe me-naving Aamangg e.

¹⁶ + o 2:16 Lom 13:14; Jem 4:16; 1Pi 2:11*In va pin sen nando hôök va voon alopayôô-to, yik yalonggpayo nawiing navu navu, osin menôôn,

1 Jon 2:17

v

1 Jon 2:22

be yiiy hatee yiiy ak in yate va voon-ate, ond me-laam vu Aamangg e, nganjo yoo vu voon-anjo.

¹⁷ + o 2:17 1Ko 7:31; Mat 7:21*Voon osin va voon-ate pin sen hil dawiing mend nôôn in-ato ond nalung nala, nganjo omaaho sen yoo monawiiing va lohvü Anutu kaa-to ond nando in mando danggata.

Omaaho sen nyiis ngaamong vu Kalisii-to

¹⁸ + o 2:18 1Pi 4:7; Mat 24:5,24; 2Jon 7*Unoopasiv-aso, yiiy aalokalaam busin taamusin ahus-anjo. Ham hango bôôy nambe omaaho sen nyiis ngaamong vu Kalisii-to navu naam, ond gêen hil sen dayiis ngaamong vu Kalisii-to ngeeyaata lalaam lung la, om yalak ni nambe busin ahus-ato manyinjo.

¹⁹ + o 2:19 Sin 20:30; 1Ko 11:19*Hil-anju lavuuh yiiy, lemu yame yate hil sil e. Nambe yate hil sil ond sil e mando gaving yiiy, le ma de sil lavuuh yiiy, ond taato nambe sil pin ond yame yate hil sil e.

²⁰ + o 2:20 1Ko 2:15; 1Jon 2:27*Le ham ond Vavi Vaambuung lakala ham lung la be ham pin alak vakasin keen ani.

²¹ Me-nambe sen ham doosin vakasin keen ondeey sa kaavu kaapiyaa-jo laas vu ham e, nganjo soo kaavu in ham alak vakasin keen ani osin ham alak ni nambe vakasin tatuhin ti me-laam vu vakasin keen alopayo le.

²² + o 2:22 1; Jon 4:3; 2Jon 7*Om lati omaaho tatuhin vaha? Omaaho sen lak alu in Yesu nambe yi me-omaaho sen Anutu yoo holin yi vulôôt-ato le, ond yik omaaho sen lak alu in Anutu

yuuh Noow-ato, ond manyinjo omaaho sen nayiis ngaamong vu Kalisii-to.

²³ + o 2:23 Jon 5:23; 15:23; 1Jon 4:15; 5:1; 2Jon 9*Hil pin sen lalak alund in Noow, ond Anutu me-nando having sil e, le ti nambe naanêêl langaah naambe Yesu ond Anutu Noow yi, ond Mangganaan Anutu nando having yi.

²⁴ Vakasin sen ham hango nyendoos-ato ond ham naapuvu tatin. Naambe ham samu vakasin sen ham hango bôôy-ato niwêêk hôôk ham alompayo, ond mem ham e mando dôôk maayuuh Mangganaan alondpayo.

²⁵ + o 2:25 Jon 3:15; 6:40*De jôôy vakasin vu yiyy nambe le biing-ambe yiyy mando metumin danggata.

²⁶ Vakasin-anjo sa kaavu vu ham lak hil sen lawiingin nambe tatuhiham-ato.

²⁷ + o 2:27 Jon 14:26; 16:13*Lemu ham ond Kalisi wiing yite Vavi Vaambuung laas lakala ham-ambe nando, om omaaho ti me-naanêêl tanasin vu ham gaving e, in

Vavi Vaambuung navu tatekin va pin vu ham, om Vavi Vaambuung-ate vakasin-anja me-vakasin tatuhiham e, nganje vakasin keen. Om ham oo anggulis Kalisi baambu lôôt nohvu Vavi Vaambuung nêêl vu ham-ato.

²⁸ + o 2:28 1; Jon 3:2; 4:17*Unoopasiv-aso, gêênanjo ham oo mando hôôk Kalisi lopayo in nambe busin sen nom-ato ond yiyy baale niwêêk gaving yi, de yame yaningga naamum vu yi le.

²⁹ + o 2:29 1; Jon 3:7,10*Ham alak ni nambe Anutu omaaho nivalok, ond ham anjak ni

naambe hil pin sen sil dawiing va lohvuu-to, ond Anutu wiing-ambe sil latu yite noondin.

3

Anutu noow-aso yiiy

¹ + o 3:1 Jon 1:12-13; 16:3*Ham akam bu le, Anutu nêêl nambe yite noow-aso yiyy ond taato nambe ahe yoo having yiyy bopaata lôôt, om yite noow-aso yiyy keen ondeey hil voon doosin yiyy, in dangga nambe sil doosin Anutu.

² + o 3:2 2Ko 3:18; Pil 3:21*Sate va-so, gêen yaatu Anutu-te unoopasiv, de vu taamusin yale mando naambe va? Vaa-ju me-neep langaah e, om yiyy doosin, lemu yalak ni nambe Kalisi naatok nom atombe yale naatu naambe yi, in yale aangge yi keen.

³ Tonde hil pin sen kand navu vaa-jo be danggin busin-anjuuto, ond sil oo davu samu sil alond-payo nivasa lôôt lohvuu sen Kalisi yoo nando nivasa lôôt-ato.

⁴ Hil pin sen dawiing va nipayaa-to ond davu kalêêh Anutu-te tanasin, in va nipaya ond many-injo vakasin kalêésin.

⁵ + o 3:5 2Ko 5:21; 1Pi 2:22-24; 1Jon 2:2*Ham alak ni nambe Kalisi laam in nambe kawiiy va nipaya na, in va nipaya ti me-neep hôök Kalisi lopayo le.

⁶ + o 3:6 Lom 6:1-2,14*Hil pin sen yoo dando hôök Kalisi lopayôô-to ond me-dawiing va nipaya le, tonde hil pin sen dawiing va nipayaa-to ond sil-ame lalak Kalisi ni keen e, nganjo sil doosin.

⁷ + o 3:7 1Jon 2:29*Unoopasiv-aso, ham-ame ambiing gaving hil-ate vakasin tatuhin e. Hil sen

mondawiing va nivasaa-to ond sil hil anivalok nambe sen Kalisi omaaho nivalok-ato.

⁸ + o 3:8 Jon 8:44*De hil sen mondawiing va nipayaa-to ond silate danggakook neep vu Saalang. In Saalang ond yoo monawiing va nipaya vu bôôy nyendoos lôôt-ambe nandôô-jo, lemu Anutu Noow ond laam in nambe kawiiy Saalang-ate kul na valok-ate.

⁹ + o 3:9 1; Jon 5:18*Hil sen latu Anutu-te noondin-ato ond me-dawiing va nipaya le, in Anutu-te nôôn metumin nando hôök sil, om silame lalohvu nambe lambiing va nipaya le, in sil latu Anutu-te noondin lung laa-to.

¹⁰ Vaa-jo navu taato Anutu-te unoopasiv-aso de Saalang-ate unoopasiv-aso, in hil sen me-dawiing va nivalok-ato de ahend-ame naving halindin e, ond Anutu me-yite unoopasiv-aso sil e.

Ham ahem oo gaving ham

¹¹ + o 3:11 Jon 13:34*Vakasin sen ham oo hango vu bôôy nyendoos-ato ond nambe yahengg oo gaving yiij.

¹² + o 3:12 Jen 4:8*De yame naambe Adam noow Kain e, in Kain ond Saalang-ate unoopasiv ti tombe yiis hali be yimb. De yiis halii-ju in dangga nambe vaati? Yik yiis in dangga nambe yoo monawiing va nipaya de hali monawiing va nivasa.

¹³ + o 3:13 Mat 5:11-12; Jon 15:18-19*Halingg-aso, naambe hil voon lanji ham paya lôôt ond ham-ame kam yu-yuuuh e.

¹⁴ + o 3:14 Jon 5:24; 1Jon 2:11*Yahengg naving Omaaho Bop-ate hil om yalak ni nambe yiij

havuuuh mop yimbin-ate lung la, de yiyy naaloh mopaatôôv metumin-ate. De omaaho sen ahe menaving hil-ato le ond naahen naloh mopaatôôv yimbin-ate.

¹⁵ + o 3:15 Mat 5:21-22; Taato 21:8*Omaaho sen yoo nayi hali paya lôôt-ato ond lohvu omaaho sen yiis omaaho ango be yimb-ato. Tonde ham oo alak ni nambe omaaho sen yiis omaaho ango be yimb-ato, ond me-naloh mop sen na mando metumin danggata-têeto le, malis.

¹⁶ + o 3:16 Jon 13:1; Gal 1:4; 1Tes 2:8*Om nambêênja yalak ahe havingin danggakook ani nambe Kalisi yoo vu yi la doos-ambe yimb in dôôvu yiyy, om yik yiyy oo aambu yiyy na doos in dôôvu yiyy halingg-aso ond mem nivasa.

¹⁷ + o 3:17 Diu 15:7*Le naambe omaaho ti-te va voon-ate nando, le yi nambe hali nativak in vati, lemu lopayo niwêêk-ambe me-hôôvu le, ond ahe me-having Anutu le, malis lôôt.

¹⁸ + o 3:18 Jem 2:15-16*Unoopasiv-aso, ahe havingin-ame nanjip ak yavingg osin yiyy dalaangg malis amu le, nganjo yaambiing nôôn jak osin yahengg gaving keenaanôôn.

Yalonggpayo niwêêk-ambe yiyy baale Anutu me

¹⁹ Yahengg gaving naambêênjo ond mem yanjak ni naambe Anutu sen vakasin keen danggakook-ato noow-aso yiyy, tombe mem yalonggpayo gato javuh-ambe yiyy baale niwêêk hôôk Anutu me.

²⁰ Le naambe yalonggpayo nayiis yiyy laah in nambe yaawiing va nipaya bôôy-ambe neep hôôk yalonggpayo om mak Anutu le bu dôôk

nyevahaan vu yiiy, ond yalonggpayo gato javuh yi naah, in Anutu bopaata savok yalonggpayo la be lak va pin ani.

²¹ + o 3:21 Hiblu 4:16*Sate va-so, naambe yalonggpayo me-nyiis yiiy in nambe Anutu me-le bu dôök yate nipaya nyevahaan e, ond mem yiiy naale niwêêk hôök Anutu me, de yame naayêénin e.

²² + o 3:22 Mat 21:22*De va pin sen yiiy navu kataangg vu Anutuu-to ond navu vu yiiy, in yiiy navu samu yite tanasin-ambe yiiy naawiing va sen nayi nivasaa-to.

²³ + o 3:23 Jon 6:29; 13:34*Tonde yite tanasin ond nambêêjo nambe yaambiing gaving Yesu Kalisi naambe Anutu Noow yi, osin

yahengg gaving yiiy nohvü tanasin sen Yesu yoo nêêl vu yiiy-atö.

²⁴ + o 3:24 Lom 8:9; 1Jon 4:13*Omaaho sen navu samu Anutu-te tanasin-ato ond yoo nando hôök Anutu lopayo, tonde Anutu nando hôök lopayo, de wiing yite Vavi Vaambuung laam vu yiiy om yalak ni nambe Anutu nando hôök yalonggpayo.

4

Vavi Vaambuung-ande tatuhin vaha-so

¹ + o 4:1 Mat 7:15; 1Jon 2:18; 2Jon 7; 1Tes 5:21*Sate va-so, hil sen danêêl nambe Vavi Vaambuung nando having sil-ambe sil danêêl tanasin-ato ond ham-ame ambiing gaving sil pin e. Nganjo ham oo sahi vêêl e naambe Anutu-te Vavi Vaambuung keen nando having sil me malis, in hil tanasin tatuhin vaha-so ngeeyaata lala dando lohvü taaku pin.

² + o 4:2 1Ko 12:3*De Anutu-te Vavi Vaambuung ond ham e anjak ni lak vakasin-anjo naambe hil pin sen danêél langaah nambe Yesu Kalisi tu omaahonôôn keen, ond hil-anjo Anutu wiing Vavi Vaambuung la nando having sil.

³ + o 4:3 2; Jon 7; 1Jon 2:18*Nganjo hil pin sen danêél nambe Yesu me-tu omaahonôôn keen e, ond Anutu me-wiing Vavi Vaambuung la nando having sil e, malis. Yik ka tatuhin-anju laam vu omaaho sen nayiis ngaamong vu Kalisii-to, in bôôy yiij hango nambe ka tatuhin-anju le naam, om gêen tok laam lung la.

⁴ + o 4:4 1; Jon 5:4-5; Mat 12:29*Unoopasiv-aso, Anutu-te noow-aso ham, om ham ayiis ngaamong vu hil tanasin vaha tatuhin-aso be ham laanggôô sil, in omaaho sen lukando ham alompayôô-ja ond niwêêk kaluuh omaaho sen lukando hil voon alondpayôô-to.

⁵ + o 4:5 Jon 15:19*Hil-anju sil vu voon-ate, om yoo lanêél vakasin voon-ate be hil vu voon langoyin sil lavand.

⁶ + o 4:6 Jon 8:47*De yiij vu Anutu-te, om omaahonôôn sen lalak Anutu ni ond sil dambe nanyend in yate vakasin, nganjo hil sen Anutu me-yite hil sil e, ond sil-ame dangoyin yiij lavangg e. Ke, lak dangga nambêenjo ond yale anjak vakasin ani naambe laam vu Vavi Vaambuung vakasin keen-ate, tonde yik yale anjak vakasin vaalu ni naambe laam vu tatuhin vaha-so.

Ahe havingin danggakook Anutu

⁷ + o 4:7 1Jon 2:29*Sate va-so, yahengg gaving yiij, in ahe havingin-anjo ond yoo danggakook vu

Anutu, om hil sen ahend naving-ato ond Anutu wiing-ambe sil latu yite noow-aso, tombe sil lalak Anutu ni keen.

⁸ + o 4:8 1Jon 4:16*Omaaho ti ahe me-naving hil e ond me-lak Anutu ni le, in ahe havingin ond yoo danggakook Anutu.

⁹ + o 4:9 Jon 3:16*De Anutu wiing Noow nôôn timu Yesu lokalaam voon in nambe biing-ambe yiyy mando metumin, ond manyinjo taato nambe Anutu ahe having yiyy keen.

¹⁰ + o 4:10 Lom 5:8-10; 1Jon 2:2*Yik ahe havin gin danggakook nambêenjo, de me-nambe yahengg having Anutu le, nganjo Anutu yoo ahe having yiyy-ambe wiing Noow Yesu laam voon ambe tu yate mop sen Anutu kawiiy yate va nipaya naa-to.

¹¹ + o 4:11 Mat 18:33*Sate va-so, Anutu ahe having yiyy keen lôôt nambêenju, om yahengg oo gaving yiyy halingg-aso keen ond mem.

¹² + o 4:12 Jon 1:18; 1Jon 2:5-6*Omaaho ti me-yi me lak Anutu le, lemu yahengg gaving halingg aso ond Anutu nando having yiyy, tombe mem yite ahe havingin neep hôök yalonggpayo keen lôôt.

¹³ + o 4:13 2Ko 1:22; 1Jon 3:24*De wiing yite Vavi Vaambuung laam vu yiyy, om yalak ni nambe Anutu nando hôök yalonggpayo de yiyy nando hôök Anutu lopayo.

¹⁴ + o 4:14 Jon 3:17*Hey aahe lak hey amengg ondeey hey naanêêl langaah nambe Aamangg wi ing Noow laam voon in nambe nôôh omaahonôôn pin vêêl.

¹⁵ + o 4:15 1Jon 5:5*Omaaho ti nambe naanêél Yesu langaah naambe Anutu Noow ond Anutu nando hôök lopayo, de yoo nando hôök Anutu lopayo.

¹⁶ + o 4:16 1Jon 4:8*De yalak ni osin yaawii-having

nambe Anutu ahe having yiii keen.

Ahe havingin ond danggakook Anutu, om naambe omaaho ti nando hôök ahe havingin alopayo ond yoo nando hôök Anutu lopayo, de Anutu nando hôök lopayo.

¹⁷ + o 4:17 1Jon 2:28*Tonde yate ahe havingin natu bopaata nalak lôôt, in nambe busin sen Anutu sahi hil pin-ate vakasin-ato ond yame aanjêenin e, yiii oo baale niwêek, in yiii nando voon-anjo ond yik lohvu Kalisi nandôô-to.

¹⁸ Niyenin-ame neep hôök ahe havingin alopayo le, nganjo ahe havingin keenaanôôn neep ond mem natiyy niyenin nala. Niyenin-anjo dangga nambe gale naatovu nipaya nyevahaan. Omaaho ti niyenin neep vu yi ond ahe havingin-ame neep vu yi niwêek lôôt e.

¹⁹ Ahe havingin neep vu yiii-anjo in Anutu yoo ahe having yiii munggin.

²⁰ De omaaho ti naanêél naambe, “Sahengg having Anutu,” lemu yoo nayi hali paya lôôt, ond omaaho tatuhin ambu, in nayi hali lemu ahe menaving e, om ahe le gaving Anutu sen me-yi me lak-ato naambe va? Malis.

²¹ + o 4:21 Mat 5:44-45; Mak 12:29-31*In tanasin-anjo ond Kalisi nêél vu yiii nambe omaaho ti ahe gaving Anutu ond yoo ahe gaving halindin-aso gaving.

5*Yaambiing gaving niwêêk ond le daanggôôl va voon-ate*

¹ + o 5:1 1; Jon 4:15*Hil pin sen dawii-having nambe Yesuu-ju yi omaaho sen Anutu yoo holin yi vulôôt-ato, ond sil latu Anutu noondin, tonde hil pin sen ahend naving omaaho ti ond ahend naving omaahôô-ju noow having.

² Naambe yahengg naving Anutu be yiyl navu samu yite tanasin, ond mem yalak ni nambe yahengg naving Anutu-te unoopasiv-aso.

³ + o 5:3 Jon 14:15,23-24; 2Jon 6; Mat 11:30*In yahengg naving Anutu ond dangga nambe yiyl navu samu yite tanasin, tombe yame le aangge naambe yite tanasin animeen e.

⁴ + o 5:4 Jon 16:33*In hil pin sen Anutu wiing-ambe latu yite noondin-ato ond daanggôôl va voon-ate, tonde va niwêêk sen naanggôôl va ni-paya voon-atêêto ond yik yalonggpayo la timu vu Anutu.

⁵ + o 5:5 Lom 8:37; 1Jon 4:4*Tonde omaaho lati naanggôôl va voon-ate? Yik omaaho sen wii-having Yesu nambe Anutu Noow yii-to.

Va yaalapim taato Yesu Kalisi langaah

⁶ + o 5:6 Jon 1:29-34; 1Jon 1:7*Yesu Kalisii-ju laam-ambe lipis bel osin kaasêêh yite nihees la. De me-laam-ambe lipis bel amu le, nganjo lipis bel osin kaasêêh nihees, tonde Vavi Vaambuung nanêêl yi langaah having, in Vavi Vaambuung ond vakasin keen danggakook.

⁷ + o 5:7 Jon 15:26*Om va yaal-anjo nanêêl Yesu langaah,

⁸ yik Vavi Vaambuung-ande bel osin nihees. Va yaal-anjo ond yik yaal ahondoos-ate vakasin neep ti.

⁹ + o 5:9 Jon 5:32-37; 8:18*Yiiy

nango vakasin sen omaahonôôn danêêl langaah-ato, lemu vakasin sen Anutu nanêêl langaah-ato ond savok omaahonôôn-ate la, de vakasin sen Anutu nanêêl langaah-ato ond nanêêl lak Noow Yesu.

¹⁰ + o 5:10 Gal 4:6*Hil pin sen londpayo nala timu vu Anutu Noow-ato, ond lalak ni vanuh nambe Yesu ond yi Anutu Noow keen. Lemu omaaho sen me-wii-having Anutu le, ond lo-hvu nêêl nambe Anutu navu tatuhin, in dangga nambe me-wii-having vakasin sen Anutu nêêl langaah lak Noow-ato le.

¹¹ Om vakasin keen sen Anutu nêêl langaah-ato nambe Anutu vu metumin danggata-te vu iiyi lung la, metumin-anjo dangga lak Noow Yesu timu.

¹² + o 5:12 Jon 3:36*Hil pin sen Anutu Noow nando having sil-ato ond sîl dala mop metumin-ate, de hil pin sen Anutu Noow-ame nando having sil-ato, ond me-dala mop metumin-ate le.

Yiiy mando metumin danggata-te

¹³ + o 5:13 Jon 20:31*Sa kaavu vakasin-anjo laas vu ham in nambe ham anjak ni vanuh naambe ham sen ham alompayo nala timu vu Anutu Noow-ato, ond metumin danggata-te tu hamate va.

¹⁴ + o 5:14 Jon 14:13; 16:23; 1Jon 3:21-22*Om iiyi naale niwêêk hôök Anutu me de yame

naayêénin e, in yiyl kataangg vati nohvu Anutu ka ond nango yate vakasin.

¹⁵ Om sen yalak ni nambe yiyl kataangg va ond nango yate vakasin, ond yik yalak ni having nambe va sen yiyl navu kataangg-ato ond yiyl hako lung la.

¹⁶ + o 5:16 Mat 12:31*Omaaho ti ji naambe hali nawiing va nipaya, le va nipayaa-ju me-lohvnambe biing-ambe omaahôô-ju na menama valok-ate le, ond hali sen yiito yoo kataangg Anutu tombe Anutu bu metumin vu yi. Manyinjo sa naanêél lak hil sen silate nipaya me-lohvnambe biing-ambe lana mend nama valok-ate le. De nipaya sen

biing-ambe omaahonôôn lana mend nama valok-atêêto ond hil dawiing, lemu same naanêél nambe ham kataangg Anutu in vaa-ju le.

¹⁷ Va pin sen hil dawiing-ambe me-nivalok-ato, ond manyinja nipaya, lemu va nipayaa-ju vaalu ond me-lohvnambe biing-ambe hil lana mend nama valok-ate le.

¹⁸ + o 5:18 1; Jon 3:9; Jon 17:15*Yalak ni nambe hil pin sen Anutu wiing-ambe sil latu yite noondin-ato ond me-dawiing va nipaya le, in Anutu Noow oo nanggin sil anivasa om Omaaho Nipaya nama me-nalak sil e.

¹⁹ + o 5:19 1; Jon 4:6*Yalak ni nambe yiyl aatu Anutu noow-aso, de va voon-ate pin oo neep hôök Omaaho Nipaya nama.

²⁰ + o 5:20 Jon 17:3*Tonde yalak ni nambe Anutu Noow laam lung la tombe vêél yalungg ak-ambe yiyl nalak Anutu keen ani. Tombe yiyl nando hôök Anutu keen-anju lopayo in dangga

nambe yaatu Noow Yesu Kalisi-te hil lung laato. Tonde Yesuu-ju ond Anutu keenaanôôn osin metumin danggata-te danggakook yi.

²¹ + o 5:21 1Ko 10:14*Om noongg-aso, ham oo ganggin ham in anutu tatuhin vaha-so. Yik vakasin lung laa-ja.

**Mangga Buang New Testament
The New Testament in the Buang, Mangga Language
of Papua New Guinea
Nupela Testamen long tokples Mangga Buang long
Niugini**

copyright © 1981 Wycliffe Bible Translators, Inc.

Language: Mangga Buang (Buang, Mangga)

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-01-19

PDF generated using Haiola and XeLaTeX on 18 Mar 2025 from source files dated 31 Aug 2023

8d739032-2a4b-567d-abd1-cb7e24ed2cd6